



Selskabslovp allanngortinneratigut takornarialerinikkut, aalisarnikkut, sanaartornikkut, ussasaarutilerinikkullu suliffeqarfiit nunatta avataaniit pigineqartut immikkut allattorsimaffikkut nalunaarsorneqarsinnaalernissaannut periarfissat pillugit Naalakkersuisut nalunaarusioqqullugit Inatsisartut aalajangiiffigisassaattut siunnersuut. Nalunaarusiaq UKA2024 nallertinnagu Inatsisartunut agguaanneqassaaq.

(Inatsisartuni ilaasortaq Aqqalu C. Jerimiassen, Atassut)

(Siullermeerneqarnera)

Qujanaq Inatsisartunut ilaasortaq Aqqalu C. Jerimiassen siunnersuummut.

Siullermik naqissuserusuppara, Demokraatit soorunami isumaqarmata, Kalaallit Nunaata annerpaamik iluaqutigissagaa, suliffeqarfiit nunatta avataaniit pigineqartut maani nunatsinniinnerat. Inatsisiliorinikkut isumaqatigiissuteqarnikkullu qulakkiissavarput pitsaanerpaamik iluanaarutigineqarnissaat, aammalu qulakkeerlugu, aningaasat maani nunatsinni sulisinneqarnissaat.

Suliarlu taanna ullut tamaasa ingerlavoq. Maaniami kialluunniit soqutigisarinngilaa suliffeqarfiit nunatta avataaniit pigineqartut aningaasarpassuarnik nunatsinnit annissuinissaat.

Taassuminnga siunnersuuteqarluni Inatsisartuni ilaasortaq Aqqalu C. Jerimiassen nassuiaammik sanaqqusivoq, misissuisussamik, qanoq annertutigisumik suliffeqarfiit nunatta avataaniit pigineqartut allattorneqarnissaat ajornannginnersoq, takornariartitsinermik ingerlatallit, aalisarnermik, sanaartornermik aamma ussasaarinermik Kalaallit Nunaanni ingerlataqartut. Demokraatini uagut ammasumik ersarissumillu ingerlatsinissaq isumaqatigilluinnartuuarput, taamaattumillu siunnersuut ajoriffissaqartinnagu.

Neriuppugut, nassuiaateqarnissamik siunnersuut ima ajunngitsigisumik takutitsissasoq, suliffeqarfiit nunatta avataaniit pigineqartut ersarissarneqarlutik, taakkualu atorlugit ingerlatani taakkartorneqartuni aningaasat qanoq ingerlanersut malinnaavigilersillugu.

Siunnersuutip ataatsimiitaliami susassaqartumi suliareqqinneqarnissaa innersuussutigineqarpoq.